

'ի լեռոն Զիթենեաց, և սկիզբն արարին քսակել և աւերել զբովանդակ շինուածս, կործանեցին զսեղանն 'ի ներքոյ գմբեթին, եւ վաստակեալ զաւուրս երկուս հիմն 'ի վեր տապալեցին սենեկաց և այլոց իրաց • և չթողին նշմարանք ինչ ասել թէ 'ի շինուածոց Հայոց է • լուսարար Կարապետն՝ որ միայն գտաւ անդ 'ի Հայոց, հազիւ կարաց զերծուցանել զսպասս եկեղեցւոյն և զայլ կարասիս, եւ դարձուցեալ զտեղին յաւեր և յապականութիւն՝ եկեալ անցանէին թմբօք և սարուք իրեւ յաղթանակաւ առաջի վանաց Ս. Յակոբայ 'ի նախատինս Հայ կղերաց • այսպէս կործանեցին Լատինք և Յոյնք զբովանդակ շինուածս Հայոց, զոր բազում աշխատութեամբ կառուցին 'ի լեռոն Զիթենեաց, ուր պատարագէին 'ի հինգշարթի եւ 'ի կիւրակէ աւուրս 'ի մխիթարութիւն ժողովրդոց, եւ թողին զայն յառաջին աւերակ միճակին ('ի 11 Սեպտեմբերի, 1839) • իսկ աւագ թարգման Սահակ վարդապետ, որ ինքն վերակացու շինութեան և պատասխանատու յամենայն դատաստանական քննութիւնս, չգտաւ 'ի վերջին ժողովի աստ • զի գնացեալ էր բերել զգործիս և զքարինս հողմաղացի, և եղև 'ի մօտիլ նորա յերուսաղէմ՝ ետես 'ի հռուստ զի ելանէր եւ դիզանայր փոշի քանդման իրրեւ մորիկ ծխոյ • սկսաւ լալ և կոծել զանձն իւր, զի ընդունայն եղեն ջանք և վաստակք իւր, այլ անցեալ էր ժամանակն և ամենայն ինչ կատարեալ • Եւ յանցանել աւուրց՝ Գատաւորն և Քաղաքապետն ետուն շինել և կարկատել զդրունս եւ զայլ տեղիս ըստ առաջին դրից, եւ զծախսն առին յերկոց վանաց • Յետ կործանելոյ զշինուածս Համբարձման տեղւոյն Գարբիէլ Պատրիարք Երուսաղէմի եւ Խորհրդական հարք, գրեցին 'ի Ս. Էջմիածին առ Յովհաննէս Կաթողիկոս Կարբեցի զամենայն հանգամանս գործոյն՝ մի առ մի պատմելով 'ի սկզբանէ մինչեւ ցլախճան, զի մի օտարազգիք բարուրանս եդեալ այլ և այլ բանիւք ամբաստանեսցեն զմիաբանութիւնս Հայոց, եւ այսպիսի եղանակաւ ծանուցեալ զճշմարտութիւն անցիցն խնդրեցին 'ի նմանէ թուղթ մխիթարական •

Եւ զի Յովհաննէս Կաթողիկոս ամօք յառաջ գրեալ էր առ Խորհրդականս, հայրական սիրով յորդորելով և պա-